

四庫全書

集部

欽定四庫全書

集部

御定佩文齋詠物詩選卷二百

二十一

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣楊世綸

謄錄監生_臣張德燾

欽定四庫全書

御定佩文齋詠物詩選卷一百二十七

樵類

五言古

樵父詞

唐
儲光義

山北饒朽木山南多枯枝
枯枝作採薪爨室私知詰
朝礪斧尋視暮行歌歸先
雪隱薜荔迎暄卧茅茨清
澗日濯足喬林時曝衣終
年登險阻不復憂安危蕩
漾與

神遊莫知是與非

樵人十詠

錄六

唐陸龜蒙

樵谿

山高谿且深蒼蒼但羣木抽條欲千尺衆亦疑樸樾一朝蒙剪伐萬古辭林蘼若遇燎圓穹微煙出雲族

樵家

草木黃落時比鄰見相喜當門清澗盡屋在寒雲裏山棚日纔下野竈煙初起所謂順天民唐堯亦如此

樵子

生在蒼崖邊能諳白雲養纔穿遠林去已在孤峰上新
和野花束步帶山詞唱日暮不歸來柴扉有人望

樵擔

輕無斗儲價重則筋力絕欲下半巖時憂襟兩如結風
高勢還却雪厚疑中折負荷誠獨難移之贈來哲

樵風

朝隨早潮去暮帶殘陽返向背得清飈相隨無近遠採

山一何遲服道常苦蹇仙術信能為年華未將晚

樵歌

縱調為野吟徐徐下雲磴固知負樵樂不減援琴興出
林方自轉隔水猶相應但取天壤情何求郢人稱

奉和樵人十詠

錄四

唐
皮日休

樵溪

何時有此谿應便生幽木橡實養山禽藤花蒙澗鹿不
止產蒸薪願當歌棫樸君知天意無以此安吾族

樵家

空山最深處太古兩三家雲蘿共夙世猿鳥同生涯衣
服濯春泉盤餐烹野花居茲老復老不解歎年華

樵徑

蒙龍中一徑繞在千峯裏歇處遇松根危中值石齒花
穿泉衣落雲拂芒鞋起自古行此途不聞顛與墜

樵風

野船渡樵客來往平波中縱橫清飈吹旦暮歸期同蘋

花惹衣白蓮影涵薪紅吾意請封爾直作鏡湖公

山中

元 于 石

我家萬山中日日採樵去捫蘿上層巔苔滑不留屨落
日負樵歸雲深失歸路誰家犬吠聲聲在雲深處

下嶺樵歌

明 許 繼

石磴緣蒼蒼負薪下層峭歌聲相應發山木閃殘照近
驚幽谷響遠答清猿嘯欸乃江上音煙波豈同調

題畫

明 鍾 泰

千峰落日陰閃閃鴉飛盡
隔樹暗鳴泉蒼茫路難認
何處遠歸樵山花紅插鬢

訪樵者

明孫一元

遠尋山中樵不識
山中路隔林伐木聲遙意
林深處不晤竟空歸
日墮西陵樹

贈山陰陳海樵

明王問

十年製一斧三日採一薪
白石自堪煮赤松為爾鄰
入市當問卜移家非避秦
獨乘遼東鶴高揖謝時人

觀束薪

王 問

山椒露未晞松約多
樛枝林踈古苔出錯
崿雲根傲坐此觀捆
載落日樵腹飢歸爨
秋籬下薪濕煙火遲

七言古

附長短句

樵客吟

唐 張 籍

山上採樵選枯樹深處樵多出辛苦
秋來野火燒櫟林枝柯已枯堪採
取斧聲坎坎在幽谷採得齊梢青葛
束日西待伴同下山竹擔彎彎向身
曲共知路傍多虎穴

未出深林不敢歇
邨西地暗狐兔鳴
稚子叫時相應聲
採樵客莫採松柏
與松柏生枝直且
堅與君作屋成家
室

樵歌

宋 鄭 震

上山劚山山丁登下山嵌山
山稜層秋殘日暮歸來晚
茅檐洗脚月又明明朝早入芙蓉城

醉樵歌

明 張 簡

東吳市中逢醉樵
鐵冠歌側髮飄蕭
兩肩屹屹何所負

青松一枝懸酒瓢自言華蓋峯頭住足跡踏徧人間路
學書學劍俱不成惟有飲酒得真趣管樂本是王霸才
松喬自有煙霞具手持崑岡白玉斧曾向月裏斫桂樹
月裏仙人不我嗔特令下飲洞庭春興來一吸海水盡
却把珊瑚樵作薪醒時邂逅逢王質石上看碁黃鵠立
斧柯爛盡不成仙不如一醉三千日于今老去名空在
處處題詩償酒債淋漓醉墨落人間夜夜風雷起光怪

贈醉樵

明
高啟

川釣已遭獵野耕終改圖不如山中樵醉卧誰得呼採
山不採松松花可為酒酒熟誰共斟木客為我友木客
已去空石牀舉杯向月邀吳剛借汝快斧斫大桂要令
四海增清光林風吹髮寒擁耳獨枕空尊碧巖裏此時
忘却負薪歸猛虎一聲驚不起世間萬事如浮煙看基
何必逢神仙青松化石鶴未返酒醒又是三千年

五言律

樵者

唐
崔塗

入山行採薇閒剪蕙為衣避世嫌山淺逢人說姓稀有
時還獨醉何處掩衡扉莫看棋終局谿風晚待歸

六言律

冬樵

明楊慎

城闕軟紅塵遠林巒空翠嵐深丁丁鳥驚谷重霏霏雪
壓擔沈沙明東郭履跡谷響南華足音歸去自換邨酒
不須解却貂金

七言律

雪樵

元龔璠

伊川門下已齊腰清苦誰如雪裏樵
浩蕩山林行靡靡低迷蓑笠影飄飄
枯梢一夜號寒墮野菜尋春待凍消
炙手故應猶可熱高人塵甑儘無聊

樵

明朱之蕃

行歌伐木隱林中平楚高原四望通
愛踏春山紫碧草醉眠秋壑舞丹楓
唯畱松柏團成蓋不許荆榛競作叢
半額夕陽歸路穩乘風破浪為誰雄

五言絕句

樵

金
李俊民

雲外山將遍人間日易斜
不知棋換世柯爛未還家

樵歌貽盧子明

明
黃克晦

採薪入深林唱歌出幽谷
樵歌非無辭辭古不可讀

六言絕句

樵

明
黎擴

窈窕徑穿林下丁丁斧徹雲間耳
慣猿驚鶴怨跡窮紅

樹青山

七言絕句

樵翁

唐
蔣吉

獨入深山信脚行，慣當貙虎不曾驚。
路傍花發無心看，惟見枯枝刮眼明。

樵叟

唐
僧貫休

樵父貌飢帶塵土，自言一生苦寒苦。
擔頭擔箇赤瓷罌，斜陽獨立勝隴塢。

樵者

宋 歐陽修

雲際依依認舊林，斷崖荒磴路難尋。
西山望見朝來雨，南澗歸時渡處深。

歲晚書事

宋 劉克莊

歲晚郊居苦寂寥，日高鹽路去城遙。
深深榕徑苔牆重，忽有銀釵叫賣樵。

次松風閣韻

宋 裘萬頃

白雲殊不作俗態，流水更似知人心。
谿邊濯足谿上坐。

樵唱一聲秋滿林

餘杭樵歌

宋謝翱

樵斧丁丁響翠微
頰肩半脫汗身衣
因來避雨巖前洞
裏得山蜂和蜜歸

九曲樵歌

元曹文晦

瓊闕嵯峨接太清
五雲洞口問長生
欲知嶺上無窮景
聽取樵歌四五聲

寄破山樵者李超無

明尹嘉賓

結隱深隨麋鹿羣上方鐘磬斷知聞空山歲晚多冰雪
若個峰頭踏凍雲

御定佩文齋詠物詩選卷二百二十七

欽定四庫全書

御定佩文齋詠物詩選卷二百二十八

漁類

四言古

酒會詩

魏
嵇康

斂絃散絲遊釣九淵重流千仞惑餌者懸倚歟莊老棲
遲永年實惟龍化蕩志浩然

江郊

宋
蘇軾

江郊慈曉雲水蒨絢碕岸斗入洄潭輪轉先生悅之布
席閒燕初日下照潛鱗俯見意釣忘魚樂此竿線優哉
悠哉玩物之變

五言古

釣竿行

魏文帝

東越河濟水遙望大海涯釣竿何珊珊魚尾何篋篋行
路之好者芳餌欲何為

釣竿

梁沈約

桂舟旣容與綠浦復回紆輕絲動弱菱微楫起單鳧叩
舷忘日暮卒歲以為娛

觀釣

陳陰鏗

澄江息晚浪釣侶柁輕舟絲垂遙濺水餌下暗通流歌
聲時斷續槳影乍橫浮寄言濯纓者滄浪終滯遊

釣竿篇

隋李巨仁

潺湲面江海滉漾矚波瀾不惜黃金餌唯憐翡翠竿斜
綸控急水定檝下飛湍潭迴風來易川長霧歇難寄言

朝市客滄浪余自安

漁父詞

唐儲光羲

澤魚好鳴水谿魚好上流漁梁不得意下渚潛垂釣
亂荇時礙楫新蘆復隱舟靜言念終始安坐看沈浮
素髮隨風揚遠心與雲遊逆浪還極浦信潮下滄洲
非為徇形役所樂在行休

釣魚灣

儲光羲

垂釣綠灣春春深杏花亂潭清疑水淺荷動知魚散
日

暮待情人維舟綠楊岸

漁父歌

唐李頎

白首何老人蓑笠蔽其身避世長不仕釣魚清江濱浦
沙明濯足山月靜垂綸寓宿湍與瀨行歌秋復春持竿
湘岸竹蕪火蘆洲薪綠水飯香稻青荷包紫鱗於中還
自樂所欲全吾真而笑獨醒者臨流多苦辛

大回中

唐元結

樊水欲東流大江又北來樊山當其南此中為大回回

中魚好遊回中多釣舟漫欲作漁人終焉無所求

藍田谿與漁者宿

唐錢起

獨遊屢忘歸况此隱淪處濯髮清冷泉月明不能去更
憐垂綸叟靜若沙上鷺一論白雲心千里滄州趣蘆中
夜火盡浦口秋山曙歎息分枝禽何時更相遇

江中晚釣寄荆南一二相識

唐劉長卿

楚郭微雨收荆門遙在目漾舟水雲裏日暮春江綠霽
華靜洲渚暝色連松竹月出波上時人歸渡頭宿一身

已無累萬事更何欲漁父自夷猶白鷗不羈束既憐滄浪水復愛滄浪曲不見眼中人相思心斷續

漁具詩

唐
陸龜蒙

網

大罟網目繁空江波浪黑沈沈到波底恰共波同色牽時萬鬢入已有千鈞力尚悔不橫流恐他人更得

罾

左手揭圓罾輕橈弄舟子不知潛鱗處但去籠煙水時

穿紫萍破忽值朱衣起

松江有朱衣鮒

貴得不貴名敢論魴與鯉

蜀

有意烹小鮮乘流駐孤棹雖然煩取捨未肯求津要
多為蝦蜆誤已分鵝鵲笑寄語龍伯人荒唐不同調

釣筒

短短截筠光悠悠卧江色蓬差櫓相應雨慢煙交織
須臾中芳餌迅疾如飛翼彼竭我還浮君看不爭得

釣車

谿上持隻輪谿邊指茅屋間乘風水便敢議朱丹轂高
多倚衡懼下有折軸速昌若載逍遙歸來卧雲族

魚梁

能編似雲薄橫絕清川口缺處欲隨波波中先置筍投
身入籠檻自古難飛走盡日水濱吟殷勤謝漁叟

叉魚

春谿正含綠良夜才參半持矛若羽輕列燭如星爛傷
鱗跳密藻碎首沈遙岸盡族染東流傍人作佳翫

鳴榔

水淺荇藻澀鉤罟無所及鏗如木鐸音勢若金鉦急敲之就深處用以資俯拾搜羅爾甚微遁去將何入

滄

萬植禦洪波森然倒林薄千顧咽雲上過半隨潮落其閒風信背更值雷聲惡天道亦哀多吾將移海若

苓簪

誰謂苓簪小我謂苓簪大盛魚自足食寘壁能為害時

將刷蘋浪又取懸藤帶不及腰上金何勞問著蔡

和襲美添詠漁具

陸龜蒙

漁菴

結茅次煙水用以資嘯傲豈謂釣家流忽同禪室號閒
憑山叟占晚有谿禽嫁華屋莫相非各隨吾所好

釣磯

揀得白雲根秋潮未曾沒坡陀坐鼇背散漫垂龍鬚持
竿從掩霧置酒復待月即此放神情何勞適吳越

筇笠

朝携下楓浦晚戴出煙艇
冒雪或平檐聽泉時仄頂
颺移靄然色波寫危如影
不識九衢塵終年居下洞

背蓬

敏手擘江筠隨身織煙縠
沙禽固不知釣伴猶初覺
閒從翠微拂靜唱滄浪濯
見說方山潭漁童盡能學

和陸魯望漁具詩

唐皮日休

網

晚掛谿上網映空如霧縠閒來發其機旋旋沈平綠下
處若煙雨牽時似崖谷必若遇鯢鮪從教通一目

罩

芒鞋下葑中步步沈輕罩既為菱浪颭亦被蓮泥膠人
立獨無聲魚煩似相抄蒲手搦霜鱗思歸舉輕棹

罟

煙雨晚來好東塘下罟去網小正星蘊舟輕欲騰翥誰
知荇深後恰值魚多處浦口更有人停橈一延佇

釣筒

籠鐘截數尺標置能幽絕從浮笠澤煙任卧桐江月絲
隨碧波漫餌逐清灘發好是趁筒時秋聲正清越

釣車

得樂湖海志不厭華輶小月中拋一聲驚起灘上鳥心
將潭底測手把波文裊何處覓奔車平波今渺渺

魚梁

波際插翠筠離離似清簾遊鱗到谿口入此無逃所斜

臨楊柳津靜下鷓鴣侶
編此欲何之終焉富春渚

鳴榔

盡日平湖上鳴榔仍動槳
丁丁入波心澄徹和清響
鷺聽獨寂寞魚驚昧來往
盡水無所逃川中有釣黨

舴艋

濶處只三尺脩然足吾事
低蓬掛釣車枯蚌盛魚餌
只好携橈坐惟堪蓋蓑睡
若遣遂平生舴艋不如是

筌簞

金少日八
卷二百二十八
朝空簦簪去暮實簦簪歸歸來倒却魚掛在幽窓扉但
聞蝦蜆氣欲生蘋藻衣十年佩此處煙雨苦霏霏

添詠漁具

錄二

皮日休

漁菴

菴中只方丈恰稱幽人住枕上悉魚經門前空釣具束
竿時倚鐸曬網還侵戶上洞有楊顥須留往來路

筍笠

圓似寫月魄輕如織煙翠泔泔向上雨不亂窺魚思攜

來沙日微挂處江風起縱戴二梁冠終身不忘爾

漁人

唐蘇拯

垂竿朝與暮披蓑卧橫楫不問清平時日樂滄波業長
畏不得閒幾度避遊畋當笑釣臺上逃名名却傳

漁家傲

宋晁補之

漁家人言傲城市未曾到生理自江湖那知城市道晴
日七八船熙然在清川但見笑相屬不省歌何曲忽然
四散歸遠處滄洲微或云後車載藏去無復在至老不

曲躬羊裘行澤中

石門漁舍

宋 薛季宣

漁家在何許，蹢馭巖下石。
花樹幾株芳，湖山數峰碧。
窈樽亭遂古，雙闕天自闢。
錦繡入茨舍，藤蘿封筆柵。
吾為江上遊，形苦世間役。
心馳定沙步，舟行過檐隙。
浪翁底鐫銘，太尉此居宅。
豈若斯人徒，風雲相主客。

秋江釣月

元 程鉅夫

荷蓑非避世，持竿不求賞。
夙抱江海心，寧為利名鞅。
天

明紫煙裏日暮清波上四顧無人知孤舟自來往

秋江釣月

元 范梈

秋江明似鏡月色靜更好之子罷琴來蘿徑初尚早衆
峰更滅沒橫笛隔幽島我船爾棹歌絲綸蕩浮藻潛魚
却寒餌宿鴈起夜縞離離不可招白露下煙艸高風桐
廬士駿業渭川老同是釣魚人那應不同道把酒酌清
輝如何答穹昊

過高郵射陽湖雜詠

元 薩都拉

大罾一丈闊小舟一葉輕相傳子與孫終古無人爭

漁父曲

元葉顒

雨過暮雲收江空涼月出輕蓑獨釣翁一曲秋風笛宿
鷺忽驚飛點破煙波碧

釣磯

明袁凱

白日自團團春流亦漾漾閒溫雨邊至輕絲風外颺既
寡羨魚情還聞濯纓唱緬彼磻上翁投竿復何向

秋江漁唱

明高棅

大川饒數畧淺瀆無吞舟日暮收我綸唱歌度中流歌
長入空闊兩岸江聲秋斷續和鳴柳搖颺隨狎鷗曲終
人不見雲水空悠悠

漁釣

明
祝允明

幸非城市住不舍煙波宅白鳥麗金沙蒼苔繞黃石涼
陰澗木青平遠水天碧梁寒魚盡落稻晚蜋猶瘠脩綸
倚筇簪敗笠蓋襪沽酒自易醉楓根忽終夕

寒江釣雪

明
周復俊

嵐雲凍不飛，江水明素練。
千林冥若空，遙峰隱還見。
漁歌巖下起，落日聲猶轉。

七言古

附長短句

漁父

唐岑參

扁舟滄浪叟，心與滄浪清。
不自道鄉里，無人知姓名。
朝從灘上飯，暮向蘆中宿。
歌竟還復歌，手持一竿竹。
竿頭釣絲長丈餘，鼓棹乘流無定居。
世人那得識深意，此翁取適非取魚。

漁父歌

唐
張志和

西塞山邊白鷺飛
桃花流水鱖魚肥
青箬笠綠蓑衣
斜風細雨不須歸

其二

松江鱖舍主人歡
菰飯莼羹亦共餐
楓葉落荻花乾
醉宿漁舟不覺寒

贈湘南漁父

唐
劉長卿

問君何所適
暮暮逢煙水
獨與不繫舟
往來楚雲裏
釣

魚非一歲終日只如此日落江清桂楫遲纖鱗百尺深
可窺沈釣垂餌不在得白首滄浪空自知

漁翁

唐
柳宗元

漁翁夜傍西巖宿曉汲清湘然楚竹煙消日出不見人
欸乃一聲山水綠迴看天際下中流巖上無心雲相逐

清江行

宋
劉子翬

漁翁一棹老清波稚子學語能漁歌日暮沙頭寒蕪竹
雨餘船角亂堆蓑驚殘小鮮仍自鱸湖海茫茫醉鄉內

夜闌酒渴漱寒流月照蘆花上蓬背

分題得漁邨晚照

宋 徐 照

漁師得魚繞谿賣小船橫繫柴門外出門老嫗喚雞犬
收歛蓑衣屋頭曬賣魚得酒又得錢歸來醉倒地上眠
小兒啾啾問煮米白鷗飛去蘆花煙

漁父詞

金 完顏壽

楊柳風前白版扉荷花雨裏綠蓑衣紅稻美錦鱗肥漁
笛閒拈月下吹

其二

釣得魚來卧看書
船頭橫置酒葫蘆
煙際柳雨中蒲乞
與人間作畫圖

漁翁圖

元程鉅夫

漁翁牽纜漁婦紡
膝上兒看掉車響
谿南谿北趁冬晴
水急船多欠新網
祝兒休啼手正忙
網成得魚如汝長

漁父

元揭傒斯

夫前撒網如車輪
婦後搖櫓青衣裙
全家託命煙波裏

扁舟為屋鷗為鄰生男已解安貧賤生女已得供炊爨
天生網罟作田園不教衣食看人面男大還娶敝家女
女大還作敝家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

右丞春谿捕魚

元
吳鎮

前灘罾兮後灘網魚兮魚兮何所往桃花錦浪綠楊邨
浦溆忽聞漁笛響我行笠澤熟此圖頓起桃源雞犬想

不如歸向茅屋底老瓦盆中醉春釀

王摩詰春谿捕魚圖

元黃公望

春江水綠春雨初好山對面青芙蓉漁舟兩兩渡江去
白頭老漁爭捕魚操篙提網相兩兩慎勿江心輕舉網
風雷昨夜過禹門桃花浪暖魚龍長我識扁舟垂釣人
舊家江南紅葉邨賣魚買酒醉明月貪夫徇利徒紛紜
世上閒愁生不識江草江花俱有適歸來一笛杏花風
亂雲飛散長天碧

漁莊

元 鄭元祐

濠上春晴花朵朵，施周強知魚與我爭。
如顧循讀書倦，馭香浪花宵鼓柁。
船頭列炬船尾唱，鯢獨如雲翻水上。
并刀斫雪鱠縷飛，拍拍茅柴薦新釀。
莊上東風柳欲綿，鯉魚吹浪迎歸船。
由來名教有樂地，看書却埽消殘年。

漁莊

元 于立

二月春水生，三月春波闊。
東風楊柳花，江上魚吹沫。
放船直入雲水鄉，蘆荻努芽如指長。
船頭濯足歌滄浪，蘭

杜吹作春風香得魚歸來三尺強有酒在壺琴在牀長
安市上人如蟻十丈紅塵埋馬耳漁莊之人百不理醉
歌長在漁莊裏

漁邨夕照

明宣宗

岳陽城頭望湘浦芳艸垂楊迷古渡晴嵐霏白夕陽紅
渺渺江邨天欲暮漁家茅屋住汀洲罷釣歸來穩繫舟
自念生涯在網罟臨風高掛向船頭出水鮮鱗雜紫蟹
鱸頭有酒還堪買東鄰西舍當此時歡笑聲餘歌款乃

豚魚吹浪白連天，隔江賈客促歸船。
餘光遠映雙鳬外，殘影半落孤鴻邊。
湖上高樓雲外起，下瞰湖湘千百里。
憑高一望楚天低，雲樹蒼蒼暮山紫。

釣竿

明
劉基

斫竹作釣竿，抽繭作釣絲。
滄洲日暖波漣漪，綠蒲茸茸柳葉垂。
釣纖餌香魚不知，石鱗激水谿毛動。
玉燕迴翔竿尾重大魚入，饌腮頰紅小魚却放淵。
沅中更祝小魚知，我意穩向深潭莫貪餌。

捕魚詞

明 高 啟

後網初沈前網起
夫婦生來業淘水
忽驚網重力難牽
打得長魚滿船喜
不教持賣去南津
且向江頭祭水神
願得年年神作主
無事全家卧煙雨
不論城中魚貴賤
換得酒歸儂不怨

清谿漁隱

明 楊 基

清谿秋來水如練
歷歷魚蝦皆可見
綠蓑酒醒雁初飛
風急蘆花吹滿面
谿南一帶是青山
遙著垂楊便可灣

漫道白鷗閒似我漁舟更比白鷗閒

林志尹秋江漁父圖

明張以寧

江風搖柳雲冥冥小艚釣歸潮滿汀賣魚得錢共秋酌
白酒船頭青瓦瓶樵青勸酒漁童舞擊甌唱歌無曲譜
船前野鴨莫驚飛我有竹弓不射汝

題漁樂圖

明王紱

遙天雨歇明殘霞涼風颯颯吹蒹葭晚來隨處可棲泊
五湖煙水皆吾家得魚且覓津橋酒旋採谿毛雜菱藕

除著沙鷗孰可親
隔蓬喚取鄰船叟
生計年年一葉舟
全家不識別離愁
婦能斫鱸兒行盞
一笛橫吹萬里秋

漁父詞

明陳繼

江柳陰江水深
釣船不到江之心
江心風高浪相激
縱使魚多不易得
釣絲只在江邊垂
得魚無魚心自怡
有時投竿把書讀
殘陽漸紅江轉綠
有時沽酒醉風前
沙鷗忘機相對眠
人生富貴那足羨
好是春鴻與秋燕
江柳陰江水深
釣船不到江之心

江鄉漁樂圖

明 劉溥

桃花雨歇春潮長江中鯉魚隨水上香蒲葉短白鷺飛
漁父乘船自來往船頭巨罾三丈餘轆轤引綆如引車
浪花觸船魚亂躍兒女相顧爭歡呼江頭賣魚朝買穀
晚來還向江頭宿老翁不愁兒不啼新婦船中炊欲熟

漁景

明 魯鐸

桃李穠纖含曉濕蓬背晴曦曬蓑笠汀洲草芳鳬雁飛
江風撲岸炊煙急中湖布網却伊誰作力包羅意恐遲

春深欲勸同休息正是魚龍孕子時

笠澤漁父詞

明文彭

無利無名一老翁
筆牀茶竈任西東
陸魯望米南宮除
却先生便是儂

其二

吳淞江上是儂家
每到秋來愛荻花
眠未足日初斜起
坐船頭看落霞

其三

釣得鱸魚不賣錢
船頭吹火趁新鮮
樽有酒月將圓落
得今宵一醉眠

捕魚詞

明
吳夢暘

錢塘蕭蕭暮潮響
雪片打船天蒼莽
此時江心魚不上
漁郎視魚如在掌
身躍水底勝落網
手擎一尾一尺廣
回身落水水幾丈
俄頃出沒魚穰穰
起立船頭髮蔽額
不著衣裳還打槳

五言律

獨釣

唐韓愈

侯家林館勝偶入得垂竿曲樹行藤角平池散芡盤羽
沈知食駛緝細覺牽難聊取夸兒女榆條繫從鞍

其二

獨往南塘上秋晨景氣醒露排四岸艸風約半池萍鳥
下見人寂魚來聞餌馨所嗟無可召不得倒吾罍

垂釣亭

唐姚合

由釣起茅亭柴扉復竹楹波清見綠影坐久識魚情白

鳥依牕宿青蒲傍
砌生欲同漁父舍
須自減逢迎

春江獨釣

唐
戴叔倫

獨釣春江上
春江引趣長
斷煙棲草碧
流水帶花香
心事同沙鳥
浮生寄野航
荷衣塵不染
何用濯滄浪

夜到漁家

唐
張籍

漁家在江口
潮水入柴扉
行客欲投宿
主人猶未歸
竹深邨路遠
月出釣船稀
遙見尋沙岸
春風動草衣

和春深二十首

錄一

唐
白居易

何處春深好春深漁父家松灣隨棹月桃浦落船花投
餌移輕楫牽輪轉小車蕭蕭蘆葉裏風起釣絲斜

漁父

唐杜牧

白髮滄浪上全忘是與非秋潭隨釣去夜月叩船歸煙
影侵蘆岸潮痕在竹扉終年狎鷗鳥來去且無機

宿漁家

唐劉威

竹屋清江上風煙四五家水圍分芰葉鄰界認蘆花雨
到魚翻浪洲迴鳥傍沙月明何處去片片席帆斜

漁父

唐李中

煙冷暮江濱，高歌散誕身。
移舟過蓼岸，待月正絲綸。
亦與樵翁約，同遊酒市春。
白頭雲水上，不識獨醒人。

谿叟

唐僧景雲

谿翁居處靜，谿鳥入門飛。
早起釣魚去，夜深乘月歸。
露香菰米熟，煙煖荇絲肥。
瀟灑塵埃外，扁舟一艸衣。

漁父吟

宋宋伯仁

小舟如鴈許，穩穩下波心。
蓑笠幾風雨，江山無古今。
清

歌鳴短棹紅葉滿疎林一醉不知世前谿月未沈

漁隱為周仲明賦

元黃庚

一笠戴春雨扁舟寄此情世間塵網密江上釣絲輕不
羨魚蝦利惟尋鷗鷺盟嚴陵臺下水猶作漢時清

漁莊

元郭翼

山色桃花裏漁莊信少雙鷗羣迴落日魚筍聚深砵楊
柳秋開屋蒹葭雨滿江野翁歸醉晚水沒繫船樁

夜到漁家

明吳鼎芳

漁家近秋水水上槿扉開地寂月初到谿寒潮不來邨
沽惟白杜野坐只青苔為說芙蓉好明朝未可回

五言排律

釣竿篇

唐
沈佺期

朝日歛紅煙垂竿向綠川人疑天上坐魚似鏡中懸避
檝時驚透猜鉤每誤牽湍危不理轄潭靜欲留船釣玉
君徒尚徵金我未賢為看芳餌下貪得會無筌

六言律

秋漁

明楊慎

日出煙消露晞百丈清江釣磯船似天邊穩坐魚若空
行無依襖靄歌星獨往婆娑舞月方歸兆熊不夢渭叟
狎鷗久忘漢機

七言律

和慕容法曹尋漁者寄城中故人

唐錢起

孤煙一點綠谿湄漁父幽居即舊基飢鷺不驚收釣處

閒麝應乳負暄時茅齋對雪開尊好稚子焚枯飯客遲
勝事宛然懷抱裏頃來新得謝公詩

西江上送漁父

唐
溫庭筠

却逐嚴光向若邪釣輪茭棹寄年華
三秋細雨愁楓葉一夜扁舟宿葦花
不見水雲應有夢偶隨煙島便成家
白蘋風起樓船暮江燕雙雙五兩斜

寄湘陰閻少府乞釣輪子

溫庭筠

釣輪形與月輪同獨繭和煙影似空
若向三江逢雁信

莫辭千里寄漁翁
蓬聲夜滴淞江雨
菱葉秋傳鏡水風
終日垂釣還有意
尺書多在錦鱗中

西塞山泊漁家

唐皮日休

白綸巾下髮如絲
靜倚楓根坐釣磯
中婦桑邨挑葉去
小兒沙市買蓑歸
雨來蓴菜流船滑
春後鱸魚墜釣肥
西塞山前終日客
隔波相羨盡依依

魯望以輪釣相示
緬懷高致因作三篇

錄二

皮日休

角柄孤輪細膩輕翠蓬十載伴君行撚時解轉蟾蜍魄
拋處能啼絡緯聲七里灘波喧一舍五雲谿月靜三更
朱衣鮒足和蓑睡誰信人間有利名

其二

盡日悠然舴艋輕小輪聲細雨冥冥三尋絲帶桐江爛
一寸鈎含笠澤腥用近詹何傳釣法收和范蠡養魚經
孤蓬半夜無餘事應被嚴灘聒酒醒

頃自桐江得一釣車以襲美樂煙波之思因出

以為玩俄辱三篇復抒訓答

錄一

唐
陸龜蒙

曾招漁侶下清潯獨繭初隨一鍾深細輟煙華無轍跡
靜含風力有車音相呼野飯依芳艸迭和山歌逗遠林
得失任渠但取樂不曾生箇是非心

贈彭蠡釣者

唐
杜荀鶴

偏坐漁舟出葦林葦花零落向秋深祇將波上鷗為侶
不把人間事繫心傍岸歌來風欲起卷絲眠去月初沈

若教我似君閒放贏得湖山到老吟

戲贈漁家

杜荀鶴

見君生計羨君閒求食求衣有底難養一箔蠶供釣線
種千莖竹作漁竿胡盧杓酌春釀酒舴艋舟流夜漲灘
却笑儂家最辛苦聽蟬鞭馬入長安

憶釣舟

唐
吳融

青山小隱枕潺湲一葉垂綸幾泝沿後浦春風隨興去
南塘秋雨有時眠慣衝曉霧驚羣鴈愛颭殘陽入亂煙

回首無人寄惆悵九衢塵土困揚鞭

釣翁

唐秦韜玉

一竿青竹老江隈荷葉衣裳可自裁
潭定靜懸絲影直風高斜颭浪花開
朝携輕櫂穿雲去暮背寒塘戴月回
世上無窮嶮巇事算應難入釣船來

贈漁者

唐胡曾

不愧人間萬戶侯子孫相繼老扁舟
往來南越諳鮫室生長東吳識蜃樓
自為釣竿能遣悶不因萱草解銷憂

羨君獨得逃名趣身外無機任白頭

贈漁者

唐韓偓

個儂居處近誅茅枳棘籬兼用荻梢盡日風扉從自掩
無人筒釣是誰拋城方四面牆陰直江闊中心水脈坳
我亦好閒求老伴莫嫌遷客且論交

贈漁翁

唐韋莊

草衣荷笠鬢如霜自說家編楚水陽滿岸秋風吹枳橘
遶陂煙雨種菰蔣蘆刀夜鱠紅鱗膩木甌朝蒸紫芋香

曾向五湖期范蠡爾來空闊久相忘

贈漁翁

唐羅隱

葉艇悠揚鶴髮垂生涯空託一輪絲是非不向眼前起
寒暑任從波上移風漾長歌秋月裏夢和春雨晝眠時
逍遙此意誰人會應有青山綠水知

釣車

唐徐夔

荻灣漁客巧粧成硃鑄銀星一點輕拋過碧江鵝鵝岸
軋殘金井轆轤聲軸磨駢角水光滑輪卷春絲水面平

把向嚴灘尋轍迹漁臺基在輟難傾

貽釣魚李處士

唐譚用之

罷吟鸚鵡艸芊芊又泛鴛鴦水上天
一棹冷涵楊柳雨片帆香挂芰荷煙
綠搖江澹萍離岸紅點雲疎橘滿川
何處邈將歸洞府數莖紅蓼一漁船

次韻南谿觀魚

宋韓駒

城西鼓楫又城東不待谿分上下風
碧樹垂楊間黃綠水盤行鱸簇青紅
橫塘日暮林巒合斷岸秋來浦溆通

安得此身無世累便隨漁艇入空濛

漁家

宋陸游

江上漁家水蘸扉閒雲片片傍苔磯釣收鷺下虛舟立
橋斷僧尋別徑歸海近岡巒多迤邐天寒霧雨正霏微
羊裘老作桐江叟點檢初心幸未違

次圭父觀漁韻

宋朱子

平生三伏斷追遊誰喚來穿澗樹幽初訝網橫天影破
忽驚人蹴浪花浮鳴榔不用齊吳榜鼓柁何須學楚謳

便有金盤堆白雪却憐清泚向東流

漁父

金李節

舉世從誰話獨醒短蓑輕箬寄餘生
半篙春水世塵遠一笛晚風山雨晴
稚乳滿船生事簡魚蝦到市利源輕
旁人莫怪機心少曾與滄洲白鳥盟

潮谿夜漁

元柳貫

谿水添流到石砭小家殘戶占魚商
蛟龍未解乘雲氣魚鼈安能避澤梁
兩岸檣林藏曲折一篝松火照微茫

淮夷固有蠙珠顆
往往鈎深得夜光

漁養

元謝宗可

翠結香莎付釣舟
一竿風雨不須愁
苔磯夜泊披寒去
葦岸昏歸帶濕收
月冷籠衣眠柁尾
天晴隨網曬船頭
羊裘莫笑狂奴錯
也著煙波萬頃秋

釣絲

謝宗可

臨流纖影衆鱗驚
消得長縲一縷輕
鈎墜亂縈春水碧
竿垂斜裊晚風清
牽回江上煙波夢
掣斷人間富貴情

我欲笑携千尺去桃花浪裏拔鯤鯨

潮谿夜漁

元
吳萊

昨夜寒潮與此通荒谿尚起百川東
行依柏樹林頭月釣拂蘆花嶼畔風
挿竹侵沙魚鳧短篝燈映草蠨砀空
太公遠矣吾將隱赤鯉何書在腹中

題秋江把釣圖

元
黃鎮成

獨載輕舸過碧川一綸牽動楚江天
蘆邊有月還吹笛柳外無風不繫船
畱火夜燃湘岸竹得魚朝送酒家錢

十年湖海真如畫亦欲狂歌一叩舷

漁却意

元錢惟善

丙穴魚來江盡頭元真卜築更深幽對門燈火三家市
何處煙波萬里舟明月竹枝揚子夜西風木葉洞庭秋
棹歌一曲閒來往指點儂家鸚鵡洲

竹榦青樂釣

明太祖

曠浦澄天濕曉煙智人樂釣穩沙前蓑輕雨霽雲收谷
釣擲綸樞水映船舉棹欲歸江月上掛帆已近暮霞邊

汀蘆處處飛螢火照徹漁邨夜不眠

題煙波泛舟圖

明 劉基

舊遊憶鼓湘湖棹日淨風微江練平小艇曲穿花底出
游魚相伴鏡中行別來漫想心徒切畫裏重看眼亦明
素石蒼松是何處願從巢父濯冠纓

吳淞漁樂

明 沈貞

家住滄洲白鳥邊捕魚沽酒自年年桃花浪暖堪垂釣
楊柳風輕不繫船帆影帶歸孤嶼月笛聲吹散一江煙

武陵亦是人間路誰說仙家別有天

懷朱漁父

明
江仲魚

九谿深處似嚴灘渺渺風塵白眼看葉艇每隨幽嶂出
茅房孤掩落花殘芙蓉衣上雲千片楊柳谿頭月一竿
釣罷瓦餅曾共醉滿身零露不知寒

峨谿晚釣

明
僧德祥

牛渚山前白鷺飛船頭坐得便無機鶯從柳絮風中聽
魚到桃花水後肥有夢只因懷太白逢人多是說元暉

一壺春酒江邨暮泊在峨谿醉不歸

五言絕句

江行

唐錢起

岸綠野煙遠江紅斜照微撐開小漁艇應到月明歸

其二

曾有煙波客能歌西塞山落帆惟待月一釣紫菱灣

其三

江雨正霏微江邨晚渡稀何曾妨釣艇更待得魚歸

江邨夜泊

唐項斯

月落江路黑前邨人語稀
幾家深樹裏一火夜漁歸

漁家

唐張喬

擁棹思悠悠更深泛積流
惟將一星火何處宿蘆洲

野釣

唐韓偓

細雨桃花水輕鷗逆浪飛
風頭阻歸棹坐睡倚蓑衣

釣叟

唐杜荀鶴

茅屋深灣裏釣船橫竹門
經營衣食外猶得弄兒孫

江上漁者

宋 范仲淹

江上往來人但愛鱸魚美君看一葉舟出沒風波裏

漁艇

宋 朱子

出載長煙重歸裝片月輕千巖猿鶴友愁絕棹歌聲

谿邊釣船

元 牟巖

莫出前谿去隨宜下釣鉤風波若不惡鱸鯽滿船頭

題漁舟風雨圖

元 吳澄

蓑笠寒颼颼一篙背拳曲有人方醉眠酒醒失茅屋

淮南漁歌

元馬祖常

棹船淮水上
曬網赤岸南
船中捕來魚
賣錢買魚籃

其二

小艇如鳬鷺
湘東柴杉木
載家復捕魚
夜夜繫江竹

捕魚圖

元虞集

網罟日相從
天寒澤國空
釣竿長倚樹
老却渭川翁

春江獨釣圖

元倪瓚

春洲菰蔣綠
江水似空虛
望山以高詠
意釣不在魚

漁邨夕照

元陳旅

落日楚江深
倒景在高樹
曬網茅屋頭
分魚石梁步

雜畫

明孫一元

盡日不見魚
風高網罟冷
蹋歌歸未歸
江波蕩人影

網集潭

明施漸

朝向湖上去
暮從湖上歸
漁家自成市
曬網及斜暉

平望夜泊

明王穉登

魚鱗成石量
桑葉論斤賣
珍重絲網難
家家月中曬

六言絕句

漁隱圖詩為程子純賦

元杜本

山下白雲縹緲水邊紅樹依稀
信有桃源深處漁人今亦志歸

漁

明黎擴

魚水心情淡淡鷗波身世悠悠
清風楊柳一曲明月蘆花滿洲

七言絕句

戲題湖上

唐 常建

湖上老人坐磯頭，湖裏桃花水却流。
竹竿嫋嫋波無際，不知何者吞吾鉤。

江邨即事

唐 司空曙

罷釣歸來不繫船，江邨月落正堪眠。
縱然一夜風吹去，只在蘆花淺水邊。

家園

唐 白居易

滄浪峽水子陵灘，路遠江深欲去難。
何似家池通小院，

卧房堦下挿漁竿

贈漁父

唐杜牧

蘆花深澤靜垂綸
月夕煙朝幾十春
自說孤舟寒水畔
不曾逢著獨醒人

懷歸

杜牧

塵埃終日滿窓前
水態雲容思浩然
爭得便歸湘浦去
却持竿上釣魚船

湖上

唐許渾

彷彿欲當三五夕萬蟾清雜亂泉紋釣魚船上一尊酒
月出渡頭零落雲

守風淮陰

許渾

遙見江陰夜漁客因思京口釣魚時一潭明月萬株柳
自去自來人不知

薛氏池垂釣

唐
溫庭筠

池塘經雨更蒼蒼萬點荷珠曉氣涼朱瑤空喻御溝水
錦鱗紅尾屬嚴光

寄裴生乞釣鈎

溫庭筠

一隨菱棹謁王侯，深媿移文負釣舟。
今日太湖風色好，却將詩句乞魚鈎。

沅江漁者

唐李羣玉

倚棹汀洲沙日晚，江鮮野菜桃花飯。
長歌一曲煙靄深，歸去滄浪綠波遠。

釣魚

李羣玉

七尺青竿一丈絲，菰蒲葉裏逐風吹。
幾回舉手拋芳餌，

驚起沙灘水鴨兒

贈江上老人

唐方干

潭底錦鱗多識釣
未投香餌即先知
欲教魚目無分別
須學揉藍染釣絲

漁父

唐汪遵

棹月眠流處處通
綠蓑葦帶混元風
靈均說盡孤高事
全與逍遙意不同

漁者

唐張喬

首戴圓荷髮不梳
葉舟為宅水為居
沙頭聚看人如市
釣得澄江一丈魚

阻風

唐
韓偓

平生情趣羨漁師
此日煙江愜所思
肥鰕香粳小艫艫
早秋滋味阻風時

醉著

韓偓

萬里清江萬里天
一邨桑柘一邨煙
漁翁醉著無人喚
過午醒來雪滿船

江南

唐
陸龜蒙

便風船尾香杭熟
細雨簷頭赤鯉跳
待得江冷閒望足
日斜方動木蘭橈

自遣

陸龜蒙

甫里先生未白頭
酒旗猶可戰高樓
長鯨好鱸無因得
乞取鮓艫作釣舟

其二

賢達垂竿小隱中
我來真作捕魚翁
前谿一夜春流急

已學嚴灘下釣筒

釣車

陸龜蒙

小輪輕線妙無雙
曾伴幽人酒一缸
洛客見時如有問
輾煙衝雨過桐江

淮上漁者

唐鄭谷

白頭波上白頭翁
家逐船移浦浦風
一尺鱸魚新釣得
兒孫吹火荻花中

釣叟

唐杜荀鶴

田不曾耕地不鋤誰人閑散得如渠渠將底物為香餌
一度擡竿一箇魚

漁父

唐
李中

偶向蘆花深處行
谿光山色晚來晴
漁家開戶相迎接
稚子爭窺犬吠聲

其二

雪鬚蒼髯白布袍
笑携頰鯉換却醪
慙慙留我宿谿上
釣艇歸來明月高

小兒垂釣

唐 胡幽貞

蓬頭稚子學垂綸
倒坐莓苔艸映身
路人借問遙招手
恐畏魚驚不應人

漁者

宋 郭震

江柳弄風顰翠黛
山花著雨濕胭脂
却收短櫂拈長笛
一葉舟中仰面吹

南塘即事

宋 翁卷

牛川寒日滿邛煙
紅樹青林古岸邊
漁子不知何處去

渚禽飛落拗罾船

舟行六絕句

錄一

宋張耒

渡頭風雨晚生寒
蓑笠漁翁坐釣船
為問蓬中有魚否
一雙新鰕出籠鮮

過葢竹作

宋朱子

浩蕩鷗盟久未寒
征驂聊此駐江干
何時買得漁船就
乞與人間畫裏看

田舍即事

宋劉克莊

谿上漁郎占斷春一川碧浪映紅雲問渠定是神仙否
櫓去如飛語不聞

漁父詞

宋方岳

陰陰深樹晚生煙雨急歸來失繫船白鷺不驚沙水淺
依然共在綠楊邊

煙谿獨釣圖

金元好問

鞍馬風沙萬里身眼明驚見楚江春綠蓑衣底元真子
不解吟詩亦可人

所見

金劉鐸

綸竿老子綠蓑衣
細雨斜風一釣磯
正是鄰家社醅熟
柳條穿得錦鱗歸

過唐州西李口

金邢安國

白沙翠竹谿上邨
漁翁賣魚喚行人
西風吹皺一谿水
水光日影金鱗鱗

江景

元黃庚

寒生鴈背天將雪
冷入魚腮水欲冰
釣艇歸來江路暝

舟人分火點漁燈

雨過

黃庚

雨過山頭雲氣濕潮生渡口岸痕深一聲短笛斜陽外
知有漁舟泊柳陰

江鄉夜興

元
尹廷高

極浦霜清鴈打圍漁燈明滅水煙微天寒想是鱸魚少
犬吠空江船夜歸

谿上

元
劉秉忠

蘆花遠映釣舟行
漁笛時聞三兩聲
一陣西風吹雨散
夕陽猶在水邊明

即事

元
許有壬

幾家門繫釣魚船
一陣風香燎麥煙
畫出太平邨落景
酒旗多在綠楊邊

漁翁

元
周權

轉櫂收緡日未西
短篷斜閣斷沙低
賣魚買酒歸來晚
風颭蘆花雪滿谿

題春江漁父圖

元 楊維禎

一片青天白鷺前
桃花水泛住家船
呼兒去換城中酒
新得槎頭縮頸鱖

綠陰垂釣

元 貢性之

茅屋人家隔薜蘿
綠陰窓戶晚涼多
日長借得南風便
時送滄浪一曲歌

釣魚圖

貢性之

谿樹蒼茫帶晚煙
谿流逆上似登天
歸來釣得鱸魚美

只博西窓一覺眠

題畫雜詩

元馬臻

數點殘鴉水遶邨幾家茅屋掩柴門
白頭谿叟歸來晚
自把漁舟繫柳根

其二

采菱渡頭秋日晚紅樓隔岸知誰家
參差遠樹雜雲氣
滅沒漁舟侵浪花

畫意

馬臻

江花江草映江樓
寫出江天一片秋
隔岸小橋低數尺
澹煙消處見漁舟

小汊

元僧圓至

麻骨燈明竹鐸疎
更深人語在茅廬
開蓬緣岸去沽酒
點火撥船來賣魚

絕句漫興

明劉基

五湖風雨夜垂綸
一葉扁舟一粟身
至竟雲濤歸大壑
煙波還屬釣魚人

題盛子昭臨吳興公谿山釣船圖

明 虞 堪

著我春江聽雨眠
鷗波亭下水如天
當時度得參差玉
吹起春風滿釣船

春江漁父

明 陳 繼

鬚絲如雪映沙鷗
煙渚風汀醉泊舟
好謝岸傍花共柳
莫將春色忌清秋

贈釣伴

明 陳憲章

短短萋萋淺淺灣夕陽倒影對南山大船鼓柁唱歌去
小艇得魚吹笛還

醉著

明 孫一元

瓦瓶倒盡醉難醒獨抱漁竿卧晚汀風露滿身呼不起
一江流水夢中聽

秋江釣者

明 潘德元

江湖最樂是漁翁何地無天著釣蓬見慣白鷗渾不避
一絲晴颺蓼花風

漁邨夕照

明
沈明臣

不知誰唱白銅鞮
楊柳邨邊即大堤
款乃一聲風斷續
打魚人背夕陽西

桃谿

明
婁堅

迎潮小艇漉魚蝦
臨水居人引釣車
不怕桃源迷處所
潮回應帶樹頭花

鰕子禪

明
僧守仁

杖藜何處問鰕禪
回首胥邨鎖暮煙
一曲漁歌秋浦外

腥風吹滿渡頭船

漁邨夜歸

明僧宗衍

月落蘋汀宿霧凝
小橋霜冷掛魚罾
歸來已是三更後
水際人家尚有燈

頌古詩

明僧普慈

每嗟船子慣垂綸
恒泊谿邊荻映身
人問不言頭自點
恐驚魚去不應人

御定佩文齋詠物詩選卷二百二十八

欽定四庫全書

御定佩文齋詠物詩選卷二百二十九

牧類

五言古

牧童詞

唐
儲光羲

不言牧田遠不道牧陂深
所念牛馴擾不亂牧童心
圓笠覆我首長蓑披我襟
方將憂暑雨亦以懼寒陰
大牛隱層坂小牛穿近林
同類相鼓舞觸物成謳吟
取樂須

史間寧問聲與音

牧童詞

元周權

我牧不憚遠牧多良苦辛所幸牧已狎馴擾無敗羣平
原濕春煙碧艸何披紛大牛隱重坂小牛飲芳津旦出
露未晞及歸景尚曛時復叩角歌歌俚全吾真取樂田
野間世事非所聞歌闌卧牛背仰見天際雲

七言古 附長短句

牧童詞

唐李涉

朝牧牛牧牛下江曲夜牧牛牧牛邨口谷荷笠出林春
雨細蘆管卧吹沙艸綠亂挿蓬蒿箭滿腰不怕猛虎欺
黃犢

牧童

唐
僧隱巖

牧童見人俱不識盡著芒鞋帶蓑笠朝陽未出衆山時
露滴蓑衣猶半濕二月三月時平原草初綠三箇五箇
騎羸牛前邨後邨來放牧笛聲纔一舉衆稚齊歌舞看
看白日又西斜各自騎牛又歸去

書晁說之考牧圖後

宋 蘇軾

我昔在田間但知羊與牛川平牛背穩如駕百斛舟舟
行無人岸自移我卧讀書牛不知前有百尾羊聽我鞭
聲如鼓輦我鞭不妄發視其後者而鞭之澤中草木長
艸長病牛羊尋山跨坑谷騰趨筋骨強煙蓑雨笠長林
下老去而今空見畫世間馬耳射東風悔不長作多牛
翁

牧牛兒

宋 張耒

牧牛兒遠陂牧遠陂牧牛芳草綠兒怒掉鞭牛不觸澗
邊柳古南風清麥深蔽目田野平烏犍礪角逐州行老
牝卧噉飢不鳴犢兒跳梁沒艸去隔林應母時一聲老
翁念兒自携餉出門先上岡頭望日斜風雨濕蓑衣拍
手唱歌尋伴歸遠却放牛風日薄近却放牛泥水惡珠
璣燕趙兒不知兒生但知牛背樂

李唐春牧圖

元
任士林

春氣熏人未耕作江頭青青牛齒白牛飢草細隨意嚼

老翁曲膝睡亦著蓬頭不記笠拋却午樹當風夢搖落
夢裏牛繩猶在握昨夜困頭牛食薄

牧童謠

明周是修

遠牧牛朝出東谿谿上頭谿頭草短牛不住直過水南
芳草洲脫衣渡水隨牛去黃蘆颯颯風和雨老鴉亂啼
野羊走絕谷無人驚四顧寒藤枯木暮山蒼同伴相呼
歸又忙石稜割脚茅割耳身上無有乾衣裳却思昨日
西邊好曠坂平原盡豐草短蓑一卧午風輕長笛三吹

夕陽早

五言律

牧童

唐
僧栖蟾

牛得自由騎春風細雨飛
青山青草裏一笠一蓑衣
日出唱歌去月明撫掌歸
何人得似爾無是亦無非

牧

明
張居正

是處桑麻好田家樂事同
耕夫閒白晝牧豎趣春風
短笛雲山外長林雨露中
命儔還藉草相與說年豐

六言律

夏牧

明楊慎

長夏冷風清朗新晴丹帔綠疇山高羊羣似蟻水闊牛
背如舟半幅生煙冪冪三腔短笛悠悠柴扉歸來早掩
斜陽影在檐頭

七言律

牧

明朱之蕃

擇地求芻兩得宜欣看茁壯望蕃孳薰風永晝叢堪枕

殘日荒邨笛任吹海上平津封已晚
窖中屬國節空奇
長原淺草清流繞倒跨徐歸信犢兒

五言絕句

牧童

唐
劉駕

牧童見客拜山果懷中落晝日驅牛歸前谿風雨惡

牧豎

唐
崔道融

牧豎持簑笠逢人氣傲然卧牛吹短笛耕却傍谿田

六言絕句

牧

明
黎擴

芳草茸茸煖碧烏犍濕濕春肥滿
蓑煙雨朝出一笛斜陽暮歸

七言絕句

牧童

唐
盧肇

誰人得似牧童心
牛背橫眠秋興深
時復往來吹一曲
何愁南北不知音

題牧牛圖

元
黃清老

平原雨多煙草浮牧童驅牛如挽舟柴門正在水深處
青山流過屋西頭

題牧牛圖

元僧行端

誰家荒疇連平原何處孤邨帶喬木官田耕盡牛正閒
且對東風弄橫玉

牧牛

明王錫爵

壠上歸來跨犂行揚鞭遙指暮雲生明朝共把春犁去
聞道君王欲省耕

平原道中見牧豕者

明 尹嘉賓

天門室宿鬱如虹海上蕭條牧豕翁
會得平津開閣意一竿寒日野田中

御定佩文齋詠物詩選卷二百二十九

欽定四庫全書

御定佩文齋詠物詩選卷二百三十

織類

五言古

子夜夏歌

晉樂府

春傾桑葉盡夏開蠶務畢晝夜理機絲知欲早成匹

作蠶絲

晉闕名

素絲非常質屈折成綺羅敢辭機杼勞但恐花色多

詠中婦織流黃

梁簡文帝

翻花滿堦砌，愁人獨上機。
浮雲西北起，孔雀東南飛。
調絲時繞腕，易鐻乍牽衣。
鳴梭逐動釧，紅粧映落暉。

與司馬治書同聞鄰婦夜織

梁王僧孺

洞房風已激，長廊月復清。
藹藹夜庭廣，飄飄曉帳輕。
雜聞百蟲思，偏傷一鳥聲。
鳥聲長不息，妾心復何極。
猶恐君無衣，夜夜當牕織。

見人織聊為之詠

梁劉邈

織織運玉指脈脈正蛾眉
振蹕開交縷停梭續斷絲
檐花照初月洞口垂朱帷
弄機行掩淚翻令織素遲

中婦織流黃

唐虞世南

寒閨織素錦含怨歛雙蛾
綜新交縷澀經脆斷絲多
衣香逐舉袖釧動應鳴梭
還恐裁縫罷無信達交河

織女詞

唐孟郊

夫是田中郎妾是田中女
當年嫁得君為君秉機杼
筋力日已疲不息牕下機
如何織紵素自著藍縷衣
官家

榜邨路更索栽桑樹

古詞

唐
施肩吾

夜裁鴛鴦綺朝織蒲桃綾欲試一寸心待縫三尺冰

邨舍雜書

宋
陸游

中春農在野蠶事亦隨作手種臨安青可飼蠶百箔累
累繭滿簇繹繹絲上簍老子雖安眠衣帛可無作

題耕織圖

元
趙孟頫

三月

三月蠶始生纖細如牛毛婉孌閨中女素手握金刀切
葉以飼之擁紙散周遭庭樹鳴黃鳥發聲和且嬌蠶飢
當採桑何暇事遊遨田時人力少丈夫方種苗相將挽
長條盈筐不終朝數口望無寒敢辭終歲勞

五月

五月夏以半谷鶯先弄晨老蠶成雪繭吐絲亂紛紜伐
輦作曲薄束縛齊榛榛黃者黃如金白者白如銀爛然
滿筐筥愛此顏色新欣欣舉家喜稍慰經時勤有客過

相問笑聲聞四鄰論功何所歸再拜謝蠶神

六月

釜下燒桑柴取繭投釜中纖纖女兒手抽絲疾如風田
家五六月綠樹陰相蒙但聞繰車響遠接邨西東旬日
可經絹弗憂杼軸空婦人能蠶桑家道當不窮更望時
雨足二麥亦稍豐酤酒田家飲醉倒嫗與翁

七月

七月暑尚熾長日弄機杼頭蓬不暇梳揮手汗如雨嚶

嚶時鳥鳴灼灼紅榴吐何心娛耳目往來忘僂僂織為
機中素老幼要紉補青燈照夜梭蟋蟀窓外語辛勤亦
何有身體衣幾縷嫁為田家婦終歲服勞苦

七言古

賦得婀娜當軒織

陳
蕭
詮

東南初日照秦樓西北織婦正嬌羞綺窓猶垂翡翠幌
珠簾半上珊瑚鈎新粧入機映春牖弄杼鳴梭挑織手
何曾織素讓新人不掩流蘇推中婦三日五匹未言遲

衫長腕弱繞青絲綾中轉躡成離鵠錦上迴文作別詩
不惜紈素同霜雪更傷秋扇篋中辭

織錦詞

唐
溫庭筠

丁東細漏侵瓊瑟影轉高梧月初出簇簌金梭萬縷紅
鴛鴦艷錦初成匹錦中百結皆同心蕊亂雲盤相間深
此意欲傳傳不得玫瑰作柱朱絃琴為君裁破合歡被
星斗迢迢共千里象尺熏爐未覺秋碧池已有新蓮子

染絲上春機

唐
李賀

玉罌汲水桐花井，舊絲沉水如雲影。
美人嬾態臙脂愁，春梭拋擲鳴高樓。
綵線結茸背復疊，白袷王郎寄桃葉。
為君挑鸞作腰綬，願君處處宜春雪。

綵絲行

宋

范成大

小麥青青大麥黃，原頭日出天色涼。
姑婦相呼有忙事，舍後煮繭門前香。
綵車嘈嘈似風雨，繭厚絲長無斷縷。
今年那暇織絹著，明日西門賣絲去。

流黃引

元

宋 裴

桂庭月午啼螢閒鸞宮露下水紈單酥燈毳帳鴈門塞
妾心料此中閨寒流黃縮澀微含潤錦石鋪雲瑩相襯
細腰杵急夜如年擣碎商飈不知困春纖易製添光澤
鳳花入眼波紋溢東天皜皜呼侍兒快取衣箱金粟尺

寒機女詞

元王逢

鴛鴦機滿東西舍雪繭綵來日相射世俗競染紅藍花
妾心鍾愛金絲柘君王錦繡焚殿前天孫鳳梭蛛網懸
織成雲霧製龍袞萬一熏香分御筵

五言律

蠶室成

明
皇甫汈

蠶館開周典，鸞輿扈漢儀。
棘牆春窈窕，桑沼晝漣漪。
蠶獻夫人日，衣明上帝時。
娥媯御王母，玉佩降瑤池。

五言排律

鮫人潛織

唐
薛能

珠館馮夷室，靈鮫信所潛。
幽閒雲碧牖，滉漾水晶簾。
機動龍梭躍，絲縈藕絆添。
七襄牛女恨，三日大人嫌。
透手

擎吳練凝水笑越縑無因聽札札空想濯纖纖

七言律

織錦女

唐秦韜玉

桃花日日覓新奇有鏡何曾及畫眉
祇恐輕梭難作匹豈辭織手徧生肌
合蟬巧間雙盤帶聯雁斜銜小折枝
豪貴大堆酬曲徹誰知辛苦一絲絲

題張萱美人織錦圖為慈谿蔡元起賦

元納延

織錦秦川窈窕娘
新翻花樣學宮坊
窓虛轉軸鶯聲滑
腕倦停梭粉汗香
雙鳳迴翔金縷細
五雲飛動綵絲長
明年夫婿封侯日
裁得宮袍遠寄將

織錦機

明瞿佑

綠紗窓下響咿啞
知是秦川第幾家
五色染成長命縷
雙頭挽就合歡花
只愁轉軸勞筋力
莫謾投梭損齒牙
不似繡牀閒坐倦
自將辛苦作生涯

五言絕句

續古

唐陳陶

嬋娟越機裏織得雙棲鳳
慰此殊世花金梭忽停弄

其二

景龍臨太極五鳳當庭舞
誰信驛間梭升天作雲雨

浣紗女

唐僧皎然

清淺白沙灘綠蒲尚堪把
家住水東西浣紗明月下

織錦圖

元楊維禎

秋深未寄衣絡緯上寒機
斷織曾相戒夫君不用歸

七言絕句

江南織綾詞

唐施肩吾

卿卿買得越人絲貪弄金梭嬾畫眉女伴能來看新篁
鴛鴦正欲上花枝

冬日田園雜興

宋
范成大

邨巷冬年見俗情
鄰翁講禮拜柴荆
長衫布縷如霜雪
云是家機自織成

織婦

宋謝翱

待得原蠶繭上絲織成送女去還歸支機本是寒砧石
留取秋深自搗衣

西湖竹枝詞

元顧瑛

陌上採桑桑葉稀家中看蠶怕蠶饑大姑要織迴文錦
小姑要織嫁時衣

過邨家

明樊阜

細莎邨路繞山斜澗水西頭一兩家桑柘葉乾鳩雨歇
茅檐索索響縑車

貧女吟

明 余育

舊絲織盡復新絲辛苦終朝不下機
祇恐與時花樣別不堪裁作嫁人衣

蘇蕙

明 梁辰魚

淚痕點滴錦花浮幾載拋梭織未休
願得璇圖似夫壻殘絲斷處認回頭

竹枝詞

明 王叔承

青桑老盡茜花開新婦看蠶婆不來
織得西川宮樣錦

機頭先與小姑裁

御定佩文齋詠物詩選卷二百三十

欽定四庫全書

御定佩文齋詠物詩選卷二百三十一

女紅類

五言古

子夜夏歌

晉樂府

田蠶事已畢思婦猶苦身當暑理締服持寄與行人

詠剪綵花

梁劉孝威

葉舒非漸大花發是初開無論人訝似蜂見也爭來

詠剪綵花

梁 朱超道

淺深依樹色舒卷聽人裁
假令春已度終在手中開

子夜冬歌

唐 崔國輔

寂寥抱寒心裁羅文襖
襖夜久頻挑燈霜寒剪刀冷

子夜吳聲四時歌

元 張 憲

瓦上松雪落燈前夜有聲
起持白玉尺呵手製吳綾
縵
紉征袍縫邊庭艸又青

七言古

白紵詞

唐張籍

皎皎白紵白且鮮將作春衣稱少年裁縫長短不能定
自持刀尺向姑前復恐蘭膏汙纖指常遣傍人收墮珥
衣裳著時寒食下還把玉鞭鞭白馬

裁衣曲

元陳基

殷勤織紵綺寸寸成文理裁作遠人衣縫縫不敢遲裁
衣不怕剪刀寒寄遠惟憂行路難臨裁更憶身長短只
恐邊城衣帶緩銀燈照壁忽垂花萬一衣成人到家

美人熨帛圖

明 劉 溥

霜帛丁東搗初歇女伴相憐白如雪掩帷下堂同此情
白腕對曳當中庭中庭無風乾未得銅斗自燒還自熨
只愁熨著有焦暈難表此身如此白小鬟莫更躡復躡
猶恐皺却葵花紋

五言律

剪綵

唐 張九齡

姹女矜容色為花不讓春既爭芳意早誰待物華真葉

作參差發枝從點綴新自然無限態長在艷陽晨

七言律

剪刀

唐
徐 夔

寶持多用繡為囊雙目交加兩鬢霜金匣掠平花翡翠
綠窓裁破錦鴛鴦初裁連理枝猶短誤綰同心帶不長
欲製縕袍先把看質非紉綺媿銛鉞

監繡

元
揭祐民

鳳閣龍庭慶自今羽鱗顏色組絲深美人百巧天孫手

才士一生紅女心願化神蠶抽甕繭用將繅藉入瑤林
讀書補報渾無力慚媿臨機惜寸陰

剪刀

明瞿佑

巧製工夫百鍊鋼持來閨閣共行藏雙環對展魚腸快
兩股齊開燕尾張針線有功憑制造綺羅無價任裁量
隨機鏤出新花樣長在佳人玉指傍

五言絕句

春夜裁縫

唐薛維翰

珠箔因風起飛蛾入最能不教人夜作方便殺明燈

無題

明
表 凱

春衣裁剪罷密葉間穠花縫到鴛鴦處行行線脚斜

七言絕句

寒閨思

唐
白居易

寒月沈沈洞房靜真珠簾外梧桐影秋霜欲下手先知
燈底裁縫剪刀冷

題針限羹字韻

宋
裘萬頃

一寸堅鋼鐵琢成綺羅叢裏度平生有時稚子敲成釣
釣得魚兒便作羹

春詞

元
胡天游

綠窓紅燭製春衣宮樣花紗要入時玉手怕裁雙鳳破
并刀欲下更遲遲

理繡

元
楊維禎

揀得金針出象筒鴛鴦雙刺扇羅中却嗔昨夜狸奴惡
抓亂金牀五色絨

宮中詞

元張昱

延華閣下日如年除是當番到御前尋出塗金香墜子
安排衣線撚春綿

題月下裁衣圖

明陳繼


香幃風卷月團團睡起裁衣思萬端秋葉未紅金剪冷
玉門關外不勝寒

宮詞

明俞允文

一承恩澤入蓬萊別賜輕綃稱體裁剪得辟邪新繭子

並房宮女鬪看來



御定佩文齋詠物詩選卷二百三十一